

Radunanzas communalas ston esser publicas

Il cussegl grond ha tractà la revisiun totala da la lescha da vischnancas

DA MARTIN CABALZAR

■ **Ier ha il cussegl grond cuntinuà cun la debatta da detagl da la revisiun totala da la lescha da vischnancas. Per vivas discussiuns han cunzunt la preschientscha a las radunanzas communalas, il dumber minimal da suprastants, il possess da las vischnancas burgaisas e l'adiever dal conto che vegn spisgià entras venditas da terren procurà.**

Per radunanzas communalas publicas

A moda contradictorica ha il cussegl grond discutà en la debatta da detagl la dumonda schebain las radunanzas communalas duain esser publicas u betg. La regenza, la fracziun liberala e la fracziun socialdemocratica èn s'engaschadas per render accessibla la radunanza communalera per possessurs d'abitaziuns secundaras e da schurnalists. Ina maiorità da la cumissiun predeliberanta e la maiorità da las fracziuns da pcd e pbd vulan surlaschar questa dumonda a las vischnancas. In liber access a las radunanzas communalas stgaffeschia trasparenza ed impedeschia ch'i dettia speculaziuns, ha *Claudia Troncana* (pld Engadin'Ota) argumentà. A Silvaplana hajan ins fatg bunas experientschas cun radunanzas communalas publicas.

Silvia Casutt-Derungs (pcd Foppa) n'ha nagut cunter la trasparenza, las vischnancas duain dentant pudair decider sezzas sch'ellas vulan quai u betg. El la vegn sustegnida dad *Ueli Bleiker* (pbd Tumleasta). «Co vulais vus impedir che novitads falladas vegnan la finala derasadas sur facebook e twitter», sa dumonda la presidenta da la regenza *Barbara Janom*. Consequentmain stuvess ins de-



Il cussegl grond ha deditgà il mardi bunamain l'entir di a la tractaziun da la revisiun totala da la lescha da vischnancas. FOTO M. HARTMANN

poner ils natels avant scadina radunanza. En quest cas èsi meglier sche las personas interessadas pon s'infurmar directamain a la radunanza communalera. La minorità da la cumissiun è vegnida sustegnida da la regenza sco era cunzunt da deputadas e deputads da la ps e pld. Politichers burgais-democratici e cristiandemocratici èn sa dustads cunter radunanzas publicas. Ils preschents na possian betg discurrer avertamain sche schurnalists sajan en sala – è stà in dals arguments. «A radunanzas publicas vegnan pli paucs vo-

tants e persuerter dapli personas mirvegliusas», ha ditg *Emil Müller*, il president da Zernez. Las vischnancas duajan pudair decider sezzas sche lur radunanzas duain esser publicas u betg e fixar quai en lur lescha communalera, han argumentà ils adversaris.

Almain trais suprastants communalas

Il cussegl grond ha dentant era prendì ina decisiun cunter la veglia da la regenza grischuna: Las suprastanzas communalas duain dumbrar almain trais commem-

bers, quai han deputadas e deputads decidì sin proposta da *Walter Grass* (pbd). El è president communal dad Urmein – ina vischnanca che ha gia ozendi be trais suprastants communalas. Urmein e Runtaglia èn las sulettas vischnancas cun quest sistem – sper la citad da Cuira, che ha perencunter in parlament communal e trais suprastants en pensum cumplain. La cussegliera governativa *Barbara Janom Steiner* ha defendì adumbatten la proposta da la regenza cun almain tschintg suprastants.

Cumissiun da gestiun po vegnir consultada

Tar fatschentas cun considerablas consequenzas finanzialas po la cumissiun da gestiun vegnir consultada. Ina proposta da *Claudia Troncana* (pld Engadin'Ota) da stritgar questa passascha vegn refusada cun 81 cunter 33 vuschs.

Elegiblas en ina suprastanza communalera ed en in parlament communal èn persunas che han sin il pli tard tar l'elecziun domicil en vischnanca. *Reto Cramer* (pcd Belfort) avess giavischè ina precisaziun quai pertutga mo autoritads communalas cun cumpetenza da decisiun e na valia betg per la cumissiun da gestiun. La proposta vegn cumbattida da *Beath Nay* (pps Cuira), *Bruno Claus* (pld Cuira) e *Tarzius Caviezel* (pld Tavau). La proposta Cramer è vegnida refusada cun 77 cunter 28 vuschs.

Conto per retgavs da vendita da terren

Veementamain cunter l'aboliziun dal conto da vendita da terren è *Bruno Claus* (pcd Cuira) che vegn sustegnì da *Margrit Darms* (pcd Foppa). Tenor Darms duai quest conto star a disposiziun per cumpensaziuns realas e per la meglieraziun dad alps e pastgiras. Tenor Claus muntass l'aboliziun da quest conto ina veritabla «expropriaziun fraida» da las vischnancas burgaisas. Davart l'adiever decidan las vischnancas politicas e burgaisas comunablamain. Tenor *Tarzius Caviezel* (pld Tavau) e *Barbara Janom* na disponan vischnancas sco Tavau, Landquart, Favugn e Termin betg d'in tal conto, senza che las vischnancas burgaisas, ni l'agricultura ni il forestalessen hajan tras quai in dischavantatg. Cun 61 cunter 48 vuschs vegn decidì che scadina vischnanca sto da nov manar in tal conto.